



Muamer Mekić

Gradski vijećnik u Gradskom vijeću Grada Sarajeva

GRADSKO VIJEĆE GRADA SARAJEVA

g-din Jasmin Ademović, predsjedavajući Gradskog vijeća

Predmet: Amandman na Prijedlog Statuta Grada Sarajeva, dostavlja se

U skladu sa članom 124. Poslovnika Gradskog vijeća Grada Sarajeva ("Službene novine Kantona Sarajevo", broj 28/09, 11/20 i 19/20), na Prijedlog Statuta Grada Sarajeva, a koji akt je utvrđen kao tačka dnevnog reda 21. sjednice Gradskog vijeća Grada Sarajeva, podnosim Amandman, kako slijedi:

AMANDMAN

U članu 31. stav (1) tačka o) Prijedloga Statuta Grada Sarajeva iza riječi "Grada Sarajeva" brišu se riječi "i daje saglasnost na pravilnik o unutrašnjoj organizaciji gradskih organa uprave i upravnih organizacija".

Obrazloženje

Na dnevnom redu Šesnaeste sjednice Gradskog vijeća Grada Sarajeva koja će se održati 30.11.2022. godine, kao jedna od tački dnevnog reda predviđen je Prijedlog Statuta Grada Sarajeva.

Ovaj materijal bio je predmetom razmatranja radnih tijela Gradskog vijeća Grada Sarajeva, pa je tako Komisija za staut i akte na svojoj 47. sjednici održanoj 11.11.2022. godine, u okviru razmatranja ove tačke dnevnog reda, jednoglasno usvojila zaključak čijom tačkom 2. je predviđeno sljedeće:

"2. U radni materijal za predlaganje Statuta Grada Sarajeva, koji danas Komisija razmatra, u članu 31. (Nadležnosti Gradskog vijeća) iza teksta alineje o) prije zarez, dodaje se tekst "i daje saglasnost na pravilnik o unutrašnjoj organizaciji gradskih organa uprave i upravnih organizacija".

Kao razlog za ovu intervenciju usmeno je obrazložena obaveza postupanja po Presudi Ustavnog suda Federacije Bosne i Hercegovine, broj: U-12/22 od 12.10.2022. godine koju je ovaj Sud donio odlučujući o zahtjevu načelnika općina koje su taksativno navedene u preambuli Presude.

Pažljivom analizom Presude (dispozitiva i obrazloženja) može se zaključiti da je nadležni sud odlučivao o povredi prava na lokalnu samoupravu po podnesenom zahtjevu, a ne o obveznosti primjene određenih odredbi zakona.

Tako je u jednom dijelu Presude navedeno:

"Dakle, u odnosu na pitanje lokalne samouprave, ovaj sud se kao institucija ovlaštena za zaštitu prava na lokalnu samoupravu prvenstveno upušta u razmatranje ustavnog položaja lokalne samouprave u kontekstu Evropske povelje", kao i to da "Eventualni sukob nadležnosti ovih organa nije pitanje povrede prava na lokalnu samoupravu prema Evropskoj povelji, te kao takvo i nije relevantno za odlučivanje".

Pri tome se treba imati u vidu i odgovor na zahtjev Predstavničkog doma Federacije BiH u kom se navodi da Komisija za lokalnu samoupravu, između ostalog, smatra da "član 52. Zakona o organizaciji organa uprave nije suprotan Ustavu FBiH, niti je u koliziji sa Zakonom o principima lokalne samouprave, međutim, smatraju da nakon donošenja odluke o organizaciji službi za upravu i drugih službi jedinice lokalne samouprave od strane općinskog vijeća, pravilnik o unutrašnjoj

organizaciji organa uprave kao provedbeni akt donosi načelnik općine (u konkretnom slučaju gradonačelnik/ca).

Cijeneći naprijed navedeno, a posebno činjenicu da je ovaj akt razmatran po redovnoj procedure, te da je sporna intervencija urađena neposredno prije održavanja sjednice Gradskog vijeća, mišljenja sam da bi bilo najsvrsishodnije o Prijedlogu akta odlučivati bez unesenih izmjena, odnosno dopuna ove vrste.

Na kraju, podsjećam Vas da je Grad Sarajevo u svom dosadašnjem radu i postupanju po ovom i sličnim pitanjima postupao u duhu zakona i drugih propisa, a na čemu će i dalje istrajavati.

Predlažem da Gradsko vijeće podrži amandman na način kako je predložen.

GRADSKI VIJEĆNIK

Muamer Mekić

Sarajevo, 23.11.2022. godine